

# Poli'a Filipai Vahe'mokizmi Avonkrezmi'nea Naneke

**1** <sup>1</sup>Poli'nane, Timoti'ene Kraisi Jisasi kazokzo eri'zampi tragoteta kina hu'neta, Filipai kumate Anumzamofa naga Kraisi Jisasinte tamentinti nehaza vahe'ene mono kva nagamotane, eri'za tamaza hu'za eneriza naga'motma kre neramu'e. <sup>2</sup>Anumza nafatimo'ene Ranti Jisasi Kraisi enena asuragiramanteno, rimpa fruzana agampu hurmanteno tamisie.

## **Poli'a Filipai vahe muse huzmanteno nunamu huzmante'nea naneke**

<sup>3</sup>Hakare zupa tamagriku nagesa nentahi'na Anumzamofa muse hunentena, <sup>4</sup>maka nunamunia'fina musezamo avi'netege'na nunamu nehu'na maka'motma antahi neramue. <sup>5</sup>Ese'ma agafa hutma mono antahi'naza knareti tamagra nagri'ene tragoteta knare musenke huama hume menina neaze. <sup>6</sup>Na'ankure nagra antahi'noe, Anumzamo tamagripi knare eri'zama erigafa hu'nea eri'za erime nevnageno, Kraisi Jisasi esnia knare eri vgaregahie. <sup>7</sup>Na'ankure maka'motma nagu'areti antahi nerami'na, Anumzamofa knare musenkea huama nehugu kina nompine, megiane ruga'a vahepi, asunku'zana tarega'mota e'neru'e. <sup>8</sup>Na'ankure Kraisi Jisasi asuragirmantea zankura, nagra tusi'za hu'na nagesa nentahuankino, Anumzamo nagrira huama hugahie. <sup>9</sup>Nagra nunamuna huneramantoe, vaheku'ma avesizamante'zamo tamagripi me'nenono ra nehnigetma, tamage antahi'zampine, knare tamagu tamagesafi hagegahaze. <sup>10</sup>Ana nehutma maka'zana refko hutma negetma, so'e zantfama hu'nesnia zanku nentahitma, avusese hutma fatgo zampi mani'nesnageno Kraisi'a eteno egahie. <sup>11</sup>Fatgo avu'ava'zama Jisasi Kraisi'na eri fore'ma nehiazamo tagripi avinete'na, vahe'mo'za nege'za Anumzamofa ra agi nemiza, agi'a erisaga hugahaze.

## **Poli'a kina nompini mani'nenono, knare musenke hu'nea naneke**

<sup>12</sup>Nafuhetane nasaraheta kama antahiho, kinafima mani'noa zamo knare musenkea (gospol) eri ra higeno vuno eno nehie. <sup>13</sup>E'ina hu'negu, Kraisi eri'zante kina hu'noa agafare, maka kinimofa avufare kva nehaza

vahe'mo'zane, maka vahe'mo'za nentahize. <sup>14</sup>Kinama hu'noa agafare maka nenfu'zane nasarhe'zane zamagu'areti Rantimofona antahi nemi'za, korora osu'za hanaveti'za Anumzamofa nanekea zamagiteti huama nehaze.

<sup>15</sup>Antahi'none, mago'amo'za hu'za tagra Kraisi naneke huama hugaragi nehu'za, ha' renenantaze. Hianagi mago'amo'za fatgo kante nehaze.

<sup>16</sup>Fatgo avu'avapi e'neriza naga'mo'za, nagrira zamesi nenante'za Kraisi naneke huama nehaze. Anumzamo'a nagrira navreno ege'na, Knare MusenKe'agura kehara neroge'za nentahiza, <sup>17</sup>ha'ma renenantaza vahe'mo'za zamagra zamesi'zante Kraisi nanekea huama nehaze. Tamage zamagu'areti nosaze, hagi kina nompima nagri amuhu namisagu ana nehaze. <sup>18</sup>Ana nehu'za amega zamagitetiro zamaguaretiro Kraisinkura huama nehaze. E'inama nehaza zankura nagra nagu'a muse nehue. Tamage, naguafina nagra muse nehue.

<sup>19</sup>Na'ankure nagra antahi'noe, kina nomp mani'nogetma, nunamu nehaza zamo'ene, Jisasi Kraisi Avamu'mo naza huno nazeri atregahie.

<sup>20</sup>Nagra mani'ne'na antahuampi, namema eritena antahuana, mago'zama nagazema erinami'zana osufta hugahue. Hagi mika zupa nagra Kraisinte hanaveti'na manigahue, korapa'ma mani'noaza hu'na manisnuo, frisnua zamo'a, Kraisi rahi amigahie. <sup>21</sup>Na'ankure nagrama ksefa'ma manisnuana Kraisinte manigahue. Hagi frisnuana knare'zantfa erigahue. <sup>22</sup>Hianagi nagrama mopa navufane mani'ne'na, eri'zama erisua zamo rga rentegahie. Nagra ina kamofa avaririgahufi ontahi'noe. <sup>23</sup>Hianagi tarega kazigati e'nea zamo navazu huno rentrako hu'nenante, na'ankure fri'nama Krais'ene umani'snua zamo'a knare zantfa hugahie. <sup>24</sup>Hanki mopa navufane mani'nua zamo'a mago'ene tamagri tmaza hugahie. <sup>25</sup>Nagra nagu'areti antahi'noe, tamagrane tragote'na miko eri'za e'nerisugeno, eri'zamo ra hanigetma negetma, tamentintimofa muse'zama'a kegahaze. <sup>26</sup>Nagri'ma Kraisi Jisasi'ma hunante'nea zankura nagrama ete'na tamagrane umani'nenketa, musena hugahaze. <sup>27</sup>Kraisi knare musenke'amo hu'nesia kante anteta mani'nenke'na eme tamagegahuo, ontamagegahuo, magoke tamagu tamagesare ene antahintahi tmifina hanavetitma mani'netma, Knare MusenKe'afi tamentintia nehinke'na tmantahi'nen. <sup>28</sup>Keha'ma renermantaza vahe'mo'za, zamagra'zmi hakare kampinti traka hugahaze. Hianagi tamagra tmazahu'za erigahaze. E'i ana avame zana Anumzamo tamigahie. <sup>29</sup>Na'ankure Kraisinte tamentinti nehaza zantekukera ontami'ne, hianagi Agri eri'zampi kna erisnazegu, tamaza hu'ne. <sup>30</sup>Kote'na knazama eri'noana tamagra nage'naze, knafima nemanuana meninena nentahize, ama ana hara tamagrane tragoteta nehune.

**Mago tarimpa huta manineta rumokizmima zamaza hanuna naneke**

**2** <sup>1</sup>E'ina higu tamarimpa tamazeri hanaveti kema Kraisinte me'nesiampi, asuragirmanteno avesi tmante'zampi, Avamupi atruma hu'zampi, avesima

ante'zane, asunku'zane me'nesiana, <sup>2</sup>nagri muse zane, eri hagerafitma magoke antahintahire'ene, magoke avesizante'ene, magoke tmagu tamagesane, magoke avamupine, magoke antahintahire manigahaze. <sup>3</sup>Inankna zama hanaza zantera ra tamagesa ontahita, tamagragukera ontahiho. Hagi tamavufa anteramita, rumofona antahi nemita husga huzmanteho. <sup>4</sup>Tamagra zankera kegva osiho, hagi ru vahe zanena kegva hiho. <sup>5</sup>Tamagra magozahu tamavutma rumokizmia huzmanteho, Kraisi Jisasimpima me'nea avu'ava rumokizmia huzmanteho. <sup>6</sup>Ana hu'neanagi Anumzane mago kna huno mani'nea ne'mo, Kraisi'a Anumzankna hu'na manisnue huno agesa ontahi'ne. <sup>7</sup>Agra avufagura antahi amneza seno, agi omne kazokzo eri'za vahe kna huno, mopafi vahe avu'avate efore hu'ne. <sup>8</sup>Kraisi'a avufa antermino, ke erizafa huteno, fri kante ruhiza huno, keka zafare fri'ne. <sup>9</sup>Na'ankure ana agafare, Anumzamo azeri antesga nehuno, musezama (gift) Agri'ma ami'neana, maka'zamofu agi'a agtere'nea agi ami'ne. <sup>10</sup>Ana hu'negu Jisasi agirera monafine, mopafine, mopa agu'afine, maka'zamo agrite rena rentegahie. <sup>11</sup>Ana nehnigeno maka vahe'mo'za Jisas Kraisi'a Rane hu'za zamagiteti huama nehu'za, Anumza Nerfa'a hanave'afi mani'ne hugahaze.

#### **Vahe'mokizmi amu'no zamifi tvi kna hu'za mani'naza naneke**

<sup>12</sup>E'izanku navesi neramantoa nafuhetma, tamagranema mani'nogetma ke'ni'a erizafa nehazankna hutma, omanisua knafina ke'ni'a amage anteho, tamagra tmazama hu'nea zanku hutma tmano nevazino, tamahirahi nerena kazigazi hutma amage anteho. <sup>13</sup>Na'ankure Anumzamo tamagripi eri'za e'nerie, Agra tmagu'a tamazeri otigetma kezafa hutma eri'zama'a e'neriza zane, Agri avesi avariri hanave'a tami'ne.

<sup>14</sup>Maka'zama hanafina, havi tamarimpa osutma hafra nosutma tamarimpa frune maninetma hugahaze. <sup>15</sup>Anama hanage'za, vahe'mo'za neramagesagetma fatgo hutma, ketmia omnesigetma nemanitma, Anumzamofu mofavre tro hutma nemanitma, havige huormantesagetma, kazaki'zampi kazigzi nehnaza vahe amu'no zamifina nemanitma, ofumo remsa hiaza hutma ama mopafina remsa huzmantegahaze. <sup>16</sup>Kasefa hu'za mani'zamofu naneke azeri hanavetiho, ana nehnage'na Kraisi ete esia knafi neramage'na hanave'afi muse nehu'na nagare'na nevu'na eri'zama eri'nozamo'a amane zankna osu'ne hu'na hugahie. <sup>17</sup>Hianagi ana zanke hu'zama waini ofagna hu'zama korani'a tagi netre'za, kre sramna neviaza hanaza zamo'a tamentintia tamaza nehina, nagra nagu'areti musena neha'nena, tamagrane muse hugahaze. <sup>18</sup>Tamagriku'enenana, nagra tutu huneramantoe, tamagra anazanke hutma musena nehutma, nagri'enenana tragotetma musenkase hugahaze.

#### **Timoti'ene Epafroditusike eri'za erisna'a naneke**

<sup>19</sup>Hianagi nagra nagesama nentahuana, Timotina osi'a knafi Ranti Jisasi avesizama me'nenkena huntanenkeno tamagrama mni'nazarega

vugahie. Ana nehnigetma tamagra inankna hutma nemnizafi eme nasmsig'e'na antahi'na musena hugahue. <sup>20</sup>Na'ankure magora Timoti kna agu'ane vahera, tamagri'ma tamema'nesia zama huga hu'nea nera omani'ne. <sup>21</sup>Na'ankure zamagra maka'mo'za zamagri'ma zamenesia zante kegva nehu'za, Kraisi Jisasi zana kegva nosaze. <sup>22</sup>Hianagi tamagra antahi'naze, Timotima tamage knare eri'za eri'neana, agra nagrane tragoteno knare musenke (gospol) hura nehuno, mofavremo nefa aza nehiankna huno, eri'zana naza huno eri'ne. <sup>23</sup>E'izanku nagrama nagesama nentahuana, ame' hu'na huntisugeno tamagritega vugahie. Inankna zano nagrite'ma fore'ma hanigu kete'na huntisugeno vugahie. <sup>24</sup>Nagra, Ramofonte nagu'a nentoe (trast), osi'a knafi tamagrira eme tamagenaku nagra nagesa nentahue.

<sup>25</sup>Hianagi nagra antahuana tamagritega Epafroditusi'a vugahie. Nagri nenfu magoke eri'za enerita, tragoteta ha' nehu'a ne' (sondia), agra tamagri naneke erino eme nasmsinia ne'kino, upama nehuazana naza nehia nere. <sup>26</sup>Na'ankure agra maka'motma tamagezanku hugeno antahintahi'amo kna higeno avufa ata eri'ne. Na'ankure tamagra krima eri'nea kema antahi'nagu ana hu'ne. <sup>27</sup>Na'ankure tamage krima eri'neana frikante ruhiza huteno kanamre'ne. Hianagi Anumzamo asuntagi ante'ne, agri'keku anara osu'ne, nagriku'ene huno ana hu'ne, ana hina nasuzamo agofetu agofetu hu'zanku, azeri oti'ne. <sup>28</sup>E'ina hu'negu huntanena vanigetma negetma muse nehnagena, nagra tamagrikura nagesa ontahina fru huna manigahue. <sup>29</sup>Uhnatisige'tma Rantimofa agifi tmagu'a muse nehutma avreho, e'inahu vahera antahi nezamita muse huta zamavreho. <sup>30</sup>Na'ankure maka'motma afete mani'netma naza osazageno tamagri nona huno, Epafroditusi'a avufagura agesa ontahino eme naza nehuno, Kraisi eri'zanku huno fri' kante ruhiza hu'ne.

### Tamage kene havi ke avu'avamofo naneke

**3** <sup>1</sup>Hagi, nafuheta vgare naneke'ni'a nehuana, Ramofonku musenkase huntaho. Ete'na tamagri'ma kegva kritmantesia nanekema mago'ene avoma negroa zamo'a navesra nosie.

<sup>2</sup>Kragna vahekura kva hiho, havi mono eri'za vahekura kva hiho, <sup>3</sup>Tagra tamage tavufa tgahu vahe mani'none. Na'ankure Anumzamofa Avamupi husga huta Kraisi Jisasina mono hunenteta, vahe'mo'za zamufama tga nehaza zampina antahi muhara nosune. <sup>4</sup>Nagranena zamufa tgahu zampina antahi muhara nehuanagi, mago vahe'mo'ma antahintahi anteno antahi muha'ma zamufa tgahu zampima haniana, nagra ana vahera zamagatere'na onaga'a mani'noe. <sup>5</sup>Nagrira nenarera kasenantege'na 8'a zgegna manuge'za, navufa taga hazage'na, Jiu kora mani'noe. Hagi Benjamin nagapinti fore hu'na, nagra Jiu vahetfa tamage mani'noe. Farisi vahe mani'nena Jiu vahe kasege

amage ante'noe. <sup>6</sup>Nagra navesite hanaveti'na mono vahera kna nezamina, nagra Jiu vahe kasege amage ante'na magore huna mago kasegea agateore'na, avariri fatgo huna hantaga osu'noe. <sup>7</sup>Hu'neanagi inankna'zama hu'noazana netre'na, anazana amnezane nehu'na, Kraisi amage'nentoe. <sup>8</sup>E'i ana zantamimpina, nagra maka'za netre'na agtere'nea antahintahi'afi Kraisi Jisasina Ranimofa antahinagena nehu'na, Agri amage anteku maka'zana amnezane hu'na netre'na, Kraisi amage' nentoe. <sup>9</sup>Agra'ene tragote'na mani'ne'na, nagra'ni'a kasege avarurua kanteti fatgoa osu'noe. Hianagi Kraisinte tamentinti nehunkeno, Anumzamo fatgo vahere hunerante. <sup>10</sup>Nagra ke'na antahi'na Jisasina nehu'na, fri'nefinti azeri oti'nea hanave'a nege'na, nagra Agrama fri'neaza hu'na nataza eri'na frinaku nehue. <sup>11</sup>E'ina hu'na mani'ne'na, fri'nefinti oti'neankna hunaku naganena nentahue.

### Kazigzi hunka vugota hanana naneke

<sup>12</sup>Nagra hago anazana eri'noe hu'na nosue, ko fatgo hu'na mani'noe hu'na nosue. Hianagi nagra kazigzi hu'na nevu'na esnia knafima naza hu'zama erisugu nentahi'na, Kraisi Jisasi'ma namisnia zanku nentahue. <sup>13</sup>Mago tamentinti nehuna nafuhetane, nsareheta sago fatgo vahe nagra mani'ne'na hago anazana azeri'noe hu'na osugahue. Hianagi korapa'zana nage'nekni'na, henkama esiazamofa azerinaku kazigzi nehue. <sup>14</sup>Anumzamo Kraisi Jisasimpi nagis hu'nege'na anagamuti miza omerisugu kazigzi hu'na nagare'na nevue.

<sup>15</sup>E'ina hu'negu maka antahi'zampi ra hu'nomota, fatgo avu'ava nehuta, ruzahu antahintahi hanazana Anumzamo anazana eri tamaveri hugahie. <sup>16</sup>Hanki tamage kema, ko'ma antahi'nona kea azerikona hu'neta amage'antegahune.

<sup>17</sup>Nafuheta nasareheta nagra nehua navunavakna nehutma, tagrama rempi huzaminona tavutavazama amagama nentaza vahera ke'so'e hiho. <sup>18</sup>Hakare'a zupa ko tamasmi'noe, menine mago ene anankege neramasmugeno navunura nehie. Na'ankure zamagri zamuzmazamo'a tamage huno Kraisi'na rugeka zafa'a ha'arenente. <sup>19</sup>Zamagrama fri'snazana, ka vu'zazmimo'a havizantfa hugahie. Zamarimpamofa avesizamo oti oti huno anumza zamigna nehige'za, zamagaze osige'za, havi avu'ava zanku muse nehu'za, mopafi zankuke zamagra nentahize. <sup>20</sup>Tagri kumara monare me'negeta, Tazahu ne'ma eramisigu negeta tagesa are'are nehuta, Ranti Jisas Kraisi'ma esigu avega ante'none. <sup>21</sup>Agra hanave omne fri tavufa eri rukrahe huranteno, hankve avufa kna huno eri tro huneranteno, ana hankave'anu hakare zana kegva hugahie.

### Mono avu'avaza hanaza naneke

**4** <sup>1</sup>Nenfugta nensarogta, nagra navesi neramante'na tamage'naku nehumotma, tamagra nagri musezane, eri'zama eri'noazamofa

nena'a mani'naze. E'ina hu'negu arone'nimota tamage hutma Ramofonte tamagra mani hanavetita maniho.

<sup>2</sup>Nagra tanasmuanki, Yodia ene Sintikigata'a Ramofo suza mani'naku mago tanarimpa hutna mani'o. <sup>3</sup>Nagra kantahinegoe, magoka eri'za e'nerumoka, ama a'trena zanaza huo, znagra hanavetine nagrane megia' vahera knare musenkea zamasm'none. Ana nehuke znagra Klemeneni ene mago'a eri'za vahe'enena, zamagia asimu eri avontafepi krente'ne.

<sup>4</sup>Hakare zupa Ramofonkura muse hiho, ete mago ene nerasmue, muse hiho! <sup>5</sup>Tamagra atrenke'za knare tamavu'tmavara vahe'mo'za keho, Ramo esia kna tva'o nehie. <sup>6</sup>Mago'a zankura tamagesa ontahitma, hakare zankura nunamu nehutma, upama hu'nesaza zanku Anumzamofone samitma, hakare zama huramante'nea zankura, Anumzamofona muse huntaho. <sup>7</sup>Anumzamofone rimpa frumoa, agtere'neankitma vahe'mota antahita keta osuga hu'nonankino, tamagu'ane, antahintahi tamia Kraisi Jisasi kva huramantegahie.

<sup>8</sup>Vgare nanekea nafuhetane nasarhetma maka knafina tamavutamavama hanazana, na'amo tamage zana me'ne, na'ante vahe'mo'a antahi nemie, na'amo fatgoa hu'ne, na'amo avu sese hu'ne, na'amo vahe'mofona asane hugahie. Na'amo agia erisaga hugahie. So'e zantfama me'neniane, husga hunte'zama me'nesiana, anazante antahintahi nehutma hampona hutma maniho. <sup>9</sup>Nagrama nehugetma rempi nehutma e'neritma, nentahitma ke'naza avu'avaza nehinkeno, rimpa fru Anumzamo'a tamagrane manigahie.

#### **Poli muse hu'nea naneke**

<sup>10</sup>Tamagrama nagriku'ma maka zupa tamagesa mago'ene antahi nenamiza zankura, nagra tusiza hu'na Ramofona muse huntentoe. Hianagi upa knafina tamagrama nazahu kankamuna omane'ne. <sup>11</sup>Mago'a zanku upa nehu'na ama kea nosue, nagra antahi'noe, mago'a zana rama'a antesuo, osia ante'nesuana, musenke hugahue. <sup>12</sup>Nagra maka zanku upa'ma huanknafine, mika'zama meknafinena, nagra hakare oku'a me'nea kankmuna rempi nehue. Namu hanio, nagatesio, rama'a antesuo ontesuana akohena fru hu'na manigahue. <sup>13</sup>Kraisi'a hanavea nenamigena, Agri hanavefi maka'zana amne hugahue.

<sup>14</sup>Hu'neanagi nagri knazampina tragotetma, knare hutma tamagra naza hu'naze. <sup>15</sup>Tamagra Filipai kumate vahe'motma antahi'naze, knare musenkema pusante Masedonia atrete'na huama'ma hu'noana, mago mono nomo'e huno naganena eme tragoteno, zagonazana eme onamizagena e'orinoe. Hagi tamagrake nami'naze. <sup>16</sup>Tesalonaika mani'nogetma anahukna hutma mago'a zupa muse'zana atupamahure nami'naze. <sup>17</sup>Ama kema nehuana mago museza namihogu meme huna tamantahinogoe, hagi veva'ma hu'nare, Anumzamoma henka mizama

tamamisigu nehue. <sup>18</sup>Na'ankure rama'aza nagrira namizageno avite'ne, upa'ma hu'noa zama'a mika eri'noe. Na'ankure Epafrotitusi musezama antageno erino e'nefina mananentake zama, kre sramna vu ofagna nehigeno, Anumzamo'a muse huno e'inahu musezana e'nerie. <sup>19</sup>Nagri Anumzamo, hakare upa'ma hanaza zana tamigahie. Agri'a hanave'amo avite'negeno Krai Jisasimpi runtanino tamigahie. <sup>20</sup>Menina tagri Anumzana tafati'mofo hanavemo mevava hugahie. Tamage.

#### **Vgare musenke**

<sup>21</sup>Krai Jisasi naga'mota musenke huneramantoe. Nafuhe'zane, nagrane magopi nemnizamo'za musenke hurmantaze. <sup>22</sup>Maka Anumzamofo naga'mo'za musenke hurmantaze. Sisa nOMPI nemnizamo'za musenke hurmantaze.

<sup>23</sup>Ranti Jisas Kraisi asunku'zamo magoke magokemotma tamagra ne mesnie.